



Salii zäme

Wänn ihr das läsed händ ihr erfolgrüch mini Rätsel chönne löse (ich hoffe es hät eu Spass gmacht). Wie ihr gsehnd han ich mich zudem am Cherze mache versucht.

Aber ja chömmemer zu mim Brieflii. Ich hoffe natürlü ihr freued eu druf und falls nöd chönnder eu gern bi mir go unsubscribe vo dem Newsletter ^^.

So bevor mer startet, eh churzii Bestandsufnahm. Mir händ das Jahr nämlich zum eine eh Address ändrig (zum Glück no im gliche Kanton suscht müssti no Geld zahle furd lieferig) & zum andere freuts mich de Verteiler um ei Person dörfe zerwiitere (Hoi Vanessa 🙌).

Au das Jahr isch viel passiert, au wenn mir eus selte alli zäme gseh händ, hämmer doch viel zäme gmacht :).

Ich fange ganz am ahfang ah und zwar han ich die erst Nacht vom Jahr gar nöd ih mim Bett verbracht (aber nöd was ihr jtz denked, wobii weiss nöd was ihr jtz denked... egal zugg zum Thema) mir händ zChloote Silvester gfiired und ich han fründlicherwiis dörfe bim Remo & de Lea ufem Sofa schlafe (btw. es sehr bequems). Abgseh da devo isch aber im Januar wie immer nöd viel spannends passiert, hauptsächlich wäg de Lehrphase. Ussert natürlü de beginn vo de ihgangs erwänte Beziehig 🤝.


Im Februar hämmer den döfe dVanessa kennelerne und zwar simmer zäme en Foxtrail go mache, sWetter isch wahrschindlii nöd ideal gsi, aber abgseh dadevo isches sehr fun gsi (au wenns Abschlussföteli nöd grad sbeste worde isch, aber lueget selber).



Das ich das Jahr nöd mal eh ganzi Hand brücht zum mini Gym bsüech zähle wüsset glaub die meiste, drum bin ich froh hämmer das Jahr ahgfang mit Padel spiele. Und au Tennis isch das Jahr wieder meh gspielt worde (unter anderem eh legendere Session mit em Tobi & Remo, glaub serst mal siit langem gsii woni mal wieder gunne han (mit em Tobi als Doppelpartner aber au es Muss)).

Im Mai simmer den en anderii Art vo Sport go luege & zwar Darts. Und ich glaub das isch eine vode grösste Kulturschock woni siit längerem gha han. Ich sägs mal so wer nöd mindestens eh Perücke oder komischii Brülle ahgha hät isch falsch ahgleit gsii haha. Es isch aber trotzdem es geils weekend gsi in Stuttgart (döt brucht mer übrigens eh Umweltplakette für die wos nöd wüssed ^^)

Im Vergliich zu de letzte paar Jahr hät das Jahr jede dSummerferie chlii andersch verbracht. Ich hoffe das alli eh guetii Ziit gha händ, persönlich han ich eh nice Wuche in Bratislava verbracht.



Gwüssi lüüt händ sich das Jahr für öpis ganz speziells entschiede und händ sich grad 6 Wuche uf Portugal abgesetzt für eh "Workation" (immer die huere Büro Lüüt am ume chiile).

Näbst mine Ferie bin ich das Jahr au wieder im Bündnerland am Festival gsi und was sölli säge es isch erlebnisrich gsii.

OPEN AIR LUMNEZIA

**«Gratis Crushed Ice»:  
Heftiger Hagel zum Openair-  
Start**

Im Oktober hämmer den gliich no en churz Trip zäme gmacht leider innere dezimierte Form, aber es isch gliich sehr funny gsii (shout out an Rico ah dere Stell fürs fahre). Mit Sport mache, de Therme und de schöne Schneewanderig in Leukerbad hämmer au biz öpis unternoh. Und am abig wenn nöd Hockey, F1 oder de Bachelor cho isch, isch eine abgloge worde (han btw. 2 Gold).

Endi November hämmer eus den no eimal bi mir dehei troffe, grundsätzlich en unspektakuläre aber trotzdem sehr lässige abig mit Fondue, Wii & Bier und eme feine Chueche (danke Lea). Und natürlü isch au döt wieder sLügiispiel uspackt worde.

De Tobi hät leider müssse absäge (👁️), aber fairerwiis mit sinere Abschlussfiir hät er en sehr guete Grund gha. Er hät nämlii das Jahr sini Schuel erfolgrüich abgeschlosse (yeyyy). Wer aber am Tobi sini Stimm vermisst chan ja bi sim Podcast go inne lose (und au mal 5 Stern döt lah & supporte).

Ah dere Stell aber au herzliche Gratulation ah alli andere wo das Jahr Prüfige oder was au immer bestande hät.



Ebefalls wünsch ich viel Glück allne wo ihri Sache no vor sich händ. Speziell am Remo bi sinere eidgenössische Prüfig im April, de Lea bi ihrne erste Modulprüfige & am Nicola (& mir ^^) bi de letzte Modulprüfige & Bachelorarbeit.

Zum Schluss no eh chlinii uflistig was ich das Jahr suscht no so mit (de einte) vobeu han dörfe erlebe: Mir sind bim Tobi uf em Boot gsi, ade Illauer Chilbi (& am Effifest), händ fisher live gseh & es paar vo eu sind au mal en match vo mir go luege (was mich au immer sehr freut 🥰).

au wenss Jahr scho fast verbii isch gsehn ich die meiste vo eu no mindistens eimal am Silvester & freu mich uf en schöne abig. Alli wo leider nöd mit eus fiired, wünsch ich ganz en schöne Silvester und en guete Start is neue Jahr.

ah dere Stell bliibt mir nur no mich für es geils 2025 mit eu zbedanke und eu und euere Family ganz schönii Wiehnachte zwüsche.

Lg Nils ❤️